

Date – 15/02/2025

Time - 18:30 -18:40Hrs

REGIONAL NEWS BULLETIN

HEADLINES (EVENING)

1. Chief Minister Pu Lalduhoma'n tun thla february ni 20 atangin Sawhthing hralhchhuah runpui tan a ni dawn tih a sawi.
2. State Election Commission chuan Mizoram chhunga Local Council leh Village Council inthlan zawh fel a nih tawh avangin Model Code of Conduct hlih a nih thu vawiin khan a puang.
3. Tun thla ni 19 atanga tan tur Mizoram Assembly budget session atan starred question 740 leh ziaka chhan chi (unstarred question) 88 a lut tawh.

<><><>

CM

Chief Minister Pu Lalduhoma'n tun thla February ni 20 atangin Secondary Collection Centre (SCC) cum Auction Centre ah Sawhthing hralhchhuah runpui tan a ni dawn tih a sawi.

He thu hi Instagram kaltlanga tarlangin Chief Minister chuan sawhthing a sumdawngte tel vek turin a sawm a, auction chu cheng 50 atanga tan tur ani tih sawiin District Agricultural Marketing Committee (DAMC) te leh Coordinator bakah SCC a duty ten a tul angin an buaipui dawn tih a sawi bawk.

Kumin February ni 20 atanga sawhthing lei tan tur chungchang hi Agriculture Minister Pu PC Vanlalruata'n January thlaa chanchinbumite a kawmnaah a lo sawi tawh a, Minister chuan sorkarin Agricultural Market Assurance Schemes hnuaia sorkarin rate tur a tihchhuah tawh angin sawhthing chu kg-ah cheng 50 a lei a ni dawn a ti a. Mizoram puma khaw hrang hrangah society 675 a awm tawh thu sawiin heng society te hian district hrang hranga sorkarin a ruahman sawhthing lak khawma leina tur, secondary collection centre 54-ah an phurkhawm dawn tih sawiin District tina District Agriculture Marketing Committee in an lo buaipui dawn a ti bawk.

Minister chuan sawhthing chu India ram hmun hrang hrangah an thar nasat thu sawiin a bik takin India ram chhim lamah an thar nasat thu a sawi a. Sorkarin kuthnathawktute chu sawhthing an lei tan hun tura ruahman, thla thar ni 20 chu nghak hram turin an ngen a, thlai dangah pawh hmalak mek a nih thu a sawi bawk.

Hetihlai hian, nimin khan Adviser to Chief Minister (Implementation of Handholding Policy) Dr. KC Lalmalsawmzauva, chuan Mizoram State Rural Livelihoods Mission (MzSRLM) hnuaia din Ropuiliani Women Farmer Producer Company Limited-te tharchhuah Sawhthing Metric Ton 10 hralhchhuah tur chu Hualngohmun dai, Aizawl atangin a vailiam a. Producer

Company leh Reliance Retail Limited te thawhhona kal zel a ni a. Sawhthing hralhchhuah tak hi Sailam leh Chamring khua a Company shareholders mi 55 hnen atangin Company-in a leikhawm a, Reliance Retail Limited hnenah hralh chhawng leh in Kolkatta-ah phurhthlak tur a ni.

Dr. KC Lalmalsawmzauva chuan, " Mizoram sawrkar-in thlai 4 lei tur a thlante theih tawp chhuahin a market lamah hma a la zel a, zaah za hlawhtling nghal lo mah se, nasa takin hma an sawn a ti a. Sawhthing lei tur ten a hlawma leina mai tur an hre thin lova, sawhthing thar teuh siin Mizoram khaw hrang hrangah an vahkual a ngai thin a, vhuvingin Sawrkar chuan a hralhna hmunpui Secondary Collection Centre 66 lai district hrang hrangah a ruahman ta a ni a ti. Tun thla February ni 20 atangin heng Secondary Collection Centre (SCC) cum Auction Centres-ah te hian Sawhthing Auction runpui (Rs.50/- a tanga tan tur) neih a ni ang. Kum 5 a vei meuh chuan heng SCC te hi mumal zawkin an kal theih tawh turah beisei a ni," a ti bawk.

<><><>

PRISON STATUS

Mizorama Prisons department hnuaia tan in hrang hrang, mi 1,386 awm theihnuaah mi 1,624 an tang mek a, awm thei zata hisap aiin mi 238 in an tam.

Nimina Prisons department in an tarlan danin Aizawla Central Jail leh Central Women Jail chu tang awm tura hisap aia an tam zualna pahnih a ni a. Central Jail-ah hian mi 438 tang thei tura hisap a nih laiin mi 827 an tang a, Central Women Jail-ah chuan mi 96 tang thei tura hisap an nih laiin mi 120 leh an nu ten an hruai luh naupang 5 an awm mek a ni. District Jail Aizawl, Lunglei leh Champhaiah te tang thei tura hisap aia tam an tang a. Hetihruah hian Prisons department hotute chuan Jail tang zat chu nitina danglam reng a nih thu an sawi a ni.

Kan corr report lo ngaithla ang.

Tunah hian Mizoram puma Jail hrang hrangah thubuai ngaihtuah mek tang mipa 893 leh hmeichhia 137, damchhung tang tur mipa 55, hrehawm taka lungin tang tura tih (rigorous imprisonment) mipa 316 leh hmeichhia 26, tang pangngai (simple imprisonment) mipa 184 leh hmeichhia 5, an vaiin mipa 1448 leh hmeichhia 168, bakah an nu ten an hruai loh theih loh naupang 8 an awm mek a ni.

Prisons department hotute chuan SASCI hnuaiah Mizoram Jail hrang hrang thawm that nan cheng vbc 55 an neih thu Akashvani an hrilh a. District tharah pawh hma lak zel a nih thu sawiin Khawzawlah chuan district jail tur ram neih a nih tawh thu leh LSC pawh tihfel a nih tawh thu an sawi a. Saitualah chuan district jail sak tawh a nih thu leh a la hman tan loh thu an sawi a. Hnahthialah chuan ram an neih fel tawh thu leh LSC an buaipui mek thu an sawi bawk a ni.

Vanlalruata/Akashvani News/Aizawl

<><><>

SEC REVOKES MCC

State Election Commission chuan Mizoram chhunga Local Council leh Village Council inthlan zawh fel a nih tawh avangin Model Code of Conduct hlih a nih thu vawiin khan a puang.

State Election Commission chuan vote chhiar zawh fel a nih thu leh result pawh nimin leh nimin piahaah puan fel a nih avangin district pakua - Aizawl, Lunglei, Serchhip, Champhai, Mamit, Kolasib, Saitual, Khawzawl leh Hnahthial district-ah te vawiin chhun dar 12 atang khan inthlan chhunga dan zawm tur hrang hrang zawm tur kalpui mek, Model Code of Conduct chu hlih a nih thu an sawi a ni.

Vawiin vek khan State Election Commission chuan Local Council candidate thihna avanga inthlan hun nimin, ni 14-a sawn Lawipu Local Council result a tichhuak a. Thlan tlin te hi Lalrinsanga ZPM, Lalnuntluanga Pautu INC, Malsawmdawngliana Rivung MNF, Lalbiakthanga ZPM leh reserved seat-ah Zohmingmawii MNF te an ni.

<><><>

ASSEMBLY

Tun thla ni 19 atanga tan tur Assembly inkhawm (budget session) atan starred question 740 lehziaka chhan chi (unstarred question) 88 a lut tawh.

Assembly secretariat atanga thu dawn danin zawhna hi sorkar atangin dan siam tura duan pathum a lut tawh a, heng te hi Labour, Employment, Skill Development and Entrepreneurship Department, Urban Development & Poverty Alleviation Department leh Finance atangin a ni a, heng bakah hian Official Resolution pakhat leh Resolution 85 a lut tawh a, Paper lay tur 5 a lut tawh bawk.

March ni 20 thleng assembly thutkhawm awm turah hian ni 14 chhung an thukhawm dawn a, February thla ah vawi 2 thu in March thla ah vawi 12 an thu dawn a, Assembly inkhawm tan ni, February ni 19 hian larsap General Vijay Kumar Singh chuan kum khata assembly inkhawm hmasa ber a nih avangin dan pangngai angin Assembly chhungah thu a sawi ang.

Tun tum assembly inkhawmah hian March ni 4 ah finance changtu chief minister Pu Lalduhoma chuan tangka kum thar (2025-2026) atana Mizoram sum hman tur ruahman (annual budget) chu a pharh dawn a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

PARTY PR- AIRPORT ISSUE

BJP Mizoram President Pu Vanlalhmuakan Mizorama Sorkar mek ZPM hian Indian Air Force hnena Airport hi an hralh a nih chuan chhuan lo awm leh zel tur thlengin dem an hlawh ngei dawn, a ti.

Nimin Friday Political Session ah thusawiin Mizoram Airport neih chhun Lengpui Airport tan hian BJP Mizoram chuan Manifesto a an lo dah tawh angin International Airport tur atan hial a hmalak an tum avangin, tuna ZPM Sorkar hmalakna anga IAF hnen a an hralh a nih chuan Mipuite hian zalen takin an hmang thei dawn lo tih a chiang hle a ni, a t a, a tih chianna atan Thuampui Helipad ngei ah pawh, Helicopter tum tur chuan phalna lak a ngai

tlat a, chuvangin Sorkar chuan inngaihtuah chiang a, Airport enkawl zui thei lo a a inhriat chuan, AAI kut ah tal hlan dan ngaihtuah tur leh chumi kawnga beidawng lova hma la turin a ngen duh a ni," a ti.

Pu Vanlalhmuaka chuan sawi chhunzawmin, "Mizoramin Chief Minister emaw Minister ram rawngbawltu tur atana a mamawh chu, Central Sorkar huaisen taka be ngam, hlawhchhamna in a hneh ve mai mai ngai loh khawpa mi tumruh leh Mizoram tana tih tak zeta rilru seng ngam te an ni a ti a, State hruaitu tam takte kal dan leh hmalak dan en chuan, Ram rawngbawl tura thlan an nih avanga awm ve tawp ang chauh an ni a, incheina pakhat ang lek ah an ngai ta mai emaw tih tur a nih avangin Mizoram hian hmasawwna tak tak hmuh theih a la ni lo a ni, a ti.

PC Party pawhin thuchhuah siamin, Mizoram sorkar hian Airport hralh lovin a Corporation a neih ho titawp mai zawk se an ti a.

PC Party chuan sum leh paia harsatna nasa tak tawk a, talchhuah ngaihna hre lo khawpa sorkar a mangang a, hnam rohlu Lengpui Airport hralh hial a tum chu an khawngaihthlak an ti a. Rohlu hralh ai chuan sorkar sum hlohna langsar ber, Corporation hrang hrang titawp zawk se an ti a, ram leh hnam leh an party tan pawh a hlawk zawk a ni tih hria a hma la nghal turin sorkar thu an rawn a ni, a ti.

PC Party chuan Party mi then khat vulh nana an hman Corporation leh Board hrang hrang hi sorkarin a titawp anih chuan Lengpui Airport hralh lovin sorkar sum harsatna hi sutkian theih a ni a. Mi thenkhat vulh duh vanga hnam rohlu hralh hi thil tha lo takah PC Party chuan a ngai an ti a ni.

<><><>